

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqquutit:

1. Ukiumi naatsorsuiffiusumi kingullermi imigassap puuanut akitsuummit nunatta karsia qanoq isertitaqarpa, aamma 2026-mut 2027-mullu qanoq isertitaqarnissaq missingersuutigineqarpa? Naatsorsukkat sapinngisamik puiaasanut, qillertuusanut imigassanullu poortuutitut allanut agguataarneqarnissaat qinnutigineqarpoq.
2. Akitsuutip tamakkiisumik atorunnaarsinneqarnerani Nunatta Karsiata isertitai qanoq annertutigisumik ikilissasut Naalakkersuisut naatsorsuutigaat, naatsorsuinernullu tunngaviit pingaarnerit suuppat?
3. Inatsisip allanngortinneqarnissaanut, isertitat naatsorsorneqarnissaannut, aningaasanut inatsisissamut ilanngunneqarnissaanut kiisalu Akileraartarnermut Aqutsisoqarfimmi qarasaasiatigut aaqqissuussani attuumassuteqartuni allannguinerlut pisariaqartinneqartut allaffissornikkut isumalluutit qanoq annertutigisut atorineqarnissaat naatsorsuutigineqarpa, AC-nut ukiumut suliffissatut koruuninngorlugulu naatsorsorlugit?
4. Atorunnaarsitsinerup kingorna allaffissornikkut sipaarutissat ataavartut qanoq annertutigisut naatsorsuutigineqarpat, aammalu piviusunngortitsinissamut suliaq aningaasaliissutit pioreersut iluanni ingerlanneqarsinnaava?

(Inatsisartunut ilaasortaq Pele Broberg, Naleraq)

Tunngavilersuut:

Apeqquutit UKA 2026-imut piareersaatitut saqqummiunneqarput. Siunertarineqarpoq isertitatigut annaasassat isumalluutinillu pisariaqartitsineq pisortatigoortumik tunngaveqartumik qulaajaavigineqarnissaat. Siunnersuummi maannamut mianersortumik missiliuutigineqarpoq suliaq AC-nut ukiumut suliffissat marluk tikillugit, tassa 1 mio. kr.-it missaannik, isumalluutini pisariaqartitsissasoq, suliaq inatsisip allanngortinneqarnissaanik, isertitat immikkut agguataarlugit naatsorsorneqarnissaannik, aningaasanut inatsisissamut ilanngussinissamik kiisalu Akileraartarnermut Aqutsisoqarfimmik inuussutissarsiortunillu ataqtigiissaarinissamik imaqarmat.



Apequtigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.